

## ■ CONVIVENZA

# In erox dad otg meters quadrat

DA BETTINA CADOTSCH\*

**J**au hai propi vulì scriver insatge che n'ha da far insumma nagut cun il coronavirus. Era sch'jau sun schurnalista hai jau plaunsieu pli ch'avunda da leger e d'udir da quest coronavirus. Cun ponderar tge che fiss in bun tema per mia columna hai jau però fatg grev a mamezza, fitg grev.

**C**ura ch'jau fatsch paratrgs davart in tema per mes text ma dumond jau adina: Tge as poss jau raquintar da mia vita? Tge anecdota fiss adattada? Tge hai jau gia adina vulì dir? Jau stoss conceder – mia vita è stada l'ultim temp fitg monotona, prest lungurusa. Per quel motiv – i ma displascha – vai uss in zichel per il coronavirus. Ma sche vus avais legì fin qua, betg dar si! Jau na menziun betg pli quest pled en quest text. Empermess!

**J**au as raquint oz da mes balcon. El mesira otg meters quadrat ed è il mument mes erox. Jau abit en il center da Cuira en ina pitschna abitaziun. Il pli bel da mia abitaziun chat jau il balcon che ha sulegl da la saira. Jau al hai endrizzà fitg cumadaivlamain cun ina maisina, ina lounge, in pèr chandailas ed jau poss dir – sch'i va anc musica – ch'jau passent



bleras bellas sairas sin mes balcon. Ins survegn spert il sentiment da vacanzas.

**D**urant mes temp da l'isolaziun stim jau mes balcon anc pli fitg ch'uschiglio. El è ideal per svanir svelt or da las atgnas quatter paraids. Il lieu per sentir ils radis da sulegl en fatscha ed il lieu per sfundrar en ils plimatschs ed en ils paratrgs. Il lieu nua ch'jau telefon savens cun mes amis. Tut senza nauscha conscienza e senza stuair bandunar la chasa. Jau sun numnadamain in uman che passenta gugent temp en la natira, cun mes chauns, en las muntognas. Da star uschè bler sco pussaivel a chasa en in'abitaziun è per quel motiv grev per mai.

**D**amai – il balcon è e vegn anc ad esser ditg in spendrader. El ha era gia purtà bler nov. Jau abit en in grond bloc cun bleras abitaziuns. Cun star sin

balcon hai jau emprendi d'enconuscher la gliueda da mes bloc dad in'otra vart che mo cun salidar curtain sin isch. Jau hai udi dal tut: per exempel tge serias che la biadia da la vischina guarda sin Netflix – ellas telefoneschian la saira ensemen per Skype. Vina vant hai jau udi bleras ravgiadas dad in bab perquai che ses mattet ha fatg en las chautschas. Plinavant sun jau vegnida a savair ch'ina da mias vischinas giada il ruaus ed jau sai ussa co ch'ils giats da tut mes vischins han num. Il pli nizzeivel ch'jau fatsch è da meglierar mes talian, perquai ch'ina famiglia discurre adina tudestg e talian.

**T**uts en mes bloc èn per sasezs sin ils otg meters quadrat, taidlan musica ed han lur discurs. Probablmain essan nus tuts engraziaivels per il balcon. Quai vegn mettain ad esser questa stad anc savens uschia ed jau ma prepar mentalmain gia sin bleras sairas sin «balkonien», sco quai ch'ins di era. E – da quai sun jau persvasa: Il pli tard uss nagin che na vul pli star en in'abitaziun senza balcon u senza iert.

\* Bettina Cadotsch è creschida si a Savognin. Ella studegia Multimedia Production a la Scola auta specialisada dal Grischun a Cuira e lavurata Radio Südostschweiz e «suedostschweiz.ch».